

香蘇山館詩集

香蘇山館古體詩鈔卷六

東鄉 吳嵩梁 蘭雪

三月十八日陶然亭雨集

自法學士式善以下客凡四十人主人則謝禮

部張定楊戶部芳燦李兵部鼎元程兵部同文

蔡禮部鑾揚張檢討問陶伊知府秉綬陳編修

用光陳刑部希祖謝吉士學崇也

騎驢千里入廬溝風檐橐筆苦未休故人招我城南遊  
窮魚縱壑鷹脫韁江亭一雨成深秋雲水曠然銷百憂  
亭前新柳嫩黃色亭外西山青欲滴烟雨濛濛畫不得  
車聲如雷喧九陌衝泥肯踏看山屐我是當年餓秋客  
一竿歸釣南湖烟白鷗夢亦隨秋船谿山俯仰三十年

聚散如此殊可憐痛飲且爲春風顛明日落花吹作田

蘇齋石硯屏詩爲翁覃溪師作

齋藏蘇書天際烏雲含雨重樓前紅

日照山明帖真蹟今得硯屏圖  
畫天然與詩境逼肖屬爲賦詩

山中雲落處結石有畫理其妙不可測世間安得此此  
石徑尺剖作屏硯雲山氣同一青斜日杳杳烟冥冥似  
將雨意來窗櫺山南山北陰又晴中有瀑布松濤聲結  
構至此難爲名筆所未到皆天成蘇齋有癖似顚米得  
之蘭峪乃狂喜夢中佳句忽飛來獨以詩禪參畫旨蔡  
君謨句東坡書游戲當時亦偶耳精神所寄七百年妙  
蹟乃結山與川化工之理歸自然萬物何必窮雕鐫君

不見天台齊先生招老作卧雲客萬松山下得奇石印  
之成文繪爲譜歌以長句配石鼓事見集中我賀此石遭遇  
同鑑賞乃得覃谿翁不然棄擲荒山中

明倪文正公小桃源詩真蹟爲伊墨卿太守作詩五

首其末章云攜將琴鶴過夷門比似溫公獨樂闋聖世遭逢無避理不應題是小桃源

東林不可廢一疏首伸君子氣南都尙可爲一死下報  
先皇知三朝要典爲公燬八策早行公不死科臣四出  
來催租軍餉不給民何辜道學封疆皆鎖斧朝廷可惜  
成孤注當時縱有武陵源欲櫂漁船向何處歸田奉母  
出山遲琴鶴夷門送者誰聖世卻言無避理暗淚已灑

冬青枝百年龍戰風濤沸春水桃花換人世冷金紙上  
有秋霜蠶魚未蝕神仙字首章有神仙自合享三山之句三山能享定  
仙才書院生祠盡劫灰上清註籍多忠孝不用胡麻飯  
一杯

恩元主人畫竹見贈題曰干青雲而直上甚愧其  
意賦此報之

主人畫竹有高格持贈吳生殊可惜枯毫得酒心槎枒  
一筆凌空氣千尺山中昨夜聞春雷怒筍縱橫穿石崖  
蒼龍獨卧幽礀底偃蹇不是干霄才竹性雖同託根異  
畢竟南枝得春氣林陰背日放稍遲瘦影蕭蕭散涼翠

主人愛竹心獨偏  
移到華池岱有煙  
此君原是瀟湘種  
一醉先教灌玉泉  
廟堂峩峩待梁棟  
笛材縱佳豈堪用  
一枝筠粉落秋深  
願吐青花飼饑鳳  
吳生與竹同性情  
下筆惟聞秋雨聲  
參天掃地皆隨分  
自古人才要養成

用放  
翁句

鶴聲篇次韻酬覃溪師

鶴聲懷空山  
蘭氣出中林  
相求在性情  
澹伫秋堂陰  
百知無一酬  
五字惟哀吟  
持之久益固  
養以靜且深  
日夕香蘇館  
寸碧生遙岑  
一踏長安塵  
冰雪違素襟  
得兼曠奧旨  
飫聆正始音  
感激更相和  
傾寫難爲心  
同調有樂

生睽離方自今孤絃愧未安泠泠張夜琴

寄洪稚存編修

與君江南別同有看山約一行不能踐塵海愧飄泊黃  
山與廬山妙處天下無相去不千里皆作神仙都我自  
江南來君已杭州去聞君不入城徑喚桐江渡桐江春  
水多一路看山行計日到潯陽五老來相迎老松三萬  
株飛瀑八千丈青龍氣夭矯白龍勢奇宕雲從石罅牛  
須曳遮四山羣龍舞其中以雲爲往還雲過松逾青樹  
稍皆瀑布一石萬松陰是我聽泉處石上有菖蒲松下  
有茯苓飲以中山泉髡可千年青廬山君已游黃山我

未到桃花阻漁舟山靈定相笑百事輸君早名山結願  
真終期遊五岳揮手謝時人

四月二十日夜書事

萬事非自謀一動乃成妄移足無戒心滅鼻有凶象藐  
躬況多艱跬步敢輕宕哀哉昏暮中驟爾精魄喪失身  
爭毫釐掉頭誤趨向意外折奇骨床下卽幽壙風雨方  
夜半呼號欲誰傍血注久始冰肉爛臉成醬籠禽羈四  
隅崖馬蹶一放波濤至旋踵巴蜀不踰丈大地念殊寬  
沉憂獨吾葬岐路生旣窮觸墻死亦壯忍痛聊須臾衰  
門賴負養辱親古所譏垂堂誠寧忘墮行懼冥冥摘埴

憂悵悵躁進多危機幸存出奢望願防衾影微恒凜鬼  
神相心空理自燭身危道可杖同臭不數人揮斤妙無  
恙作詩求良箴隨事獲深創

題覃溪師所藏東坡書蔡君謨詩及陳太守放營

妓詩墨蹟

學士一生春作夢卻寫君謨夢中詩後來更說夢中夢  
花月湖山皆涕洟西湖日夕公事了想見迴船初霽時  
斷雲含雨斜照入樓下湛碧搖風漪陳家老守頗好事  
不許春恨侵蛾眉雕籠一放雪鶲鶲羞殺東風桃李姿  
此詩不入烏臺案諸君且賞黃絹詞嶺海萬重墮吟魄

茶烟一榻生鬢絲熙寧舊事那可說遺墨幸收柯九思

山谷跋失道園在倪瓈

張雨馬治董其昌

同嗟咨蘇齋今

日續詩夢手蹟百勝摹殘碑偃松贊字獲亦創筆法勁

比寒松枝硯屏昨又蘭峪出天然石畫陰晴移始信神

明有真契更七百年藏者誰前生我豈老居士看人青

眼萬里期詩成押尾附名印嵩陽帖後休傳疑先生向

及陳學士嵩慶名印押於卷尾  
蓋以原詩中有嵩陽居士句也

六月十五日夜且園同法梧門學士看月

斜日墮山湖色暝老樹交檐露華冷月明似與幽人期  
風味況兼新句永庭前空水澄若潭屋後積烟暗於嶺

未看窈窕上林稍先與玲瓏散疎影溼螢穿葉墜復高  
栖鳥踏枝啼乍警且貪涼卧青簾移何用夜遊紅燭秉  
小園花信閱榮枯鄰寺鐘聲入虛廻一心出世雲自閒  
萬事中年酒初醒明朝日霽觀曠荷今夕風懷對佳茗  
炎天畢竟水鄉宜歸櫂南湖舊漁艇

是夜雨中月尤佳再爲一詩

一更待月二更吐三更天淨月當午四更林葉忽飄蕭  
一片涼雲送疎雨雨聲漸密雲轉稀明月依然在高樹  
濛濛地溼烟欲流磊磊天青星可數庭陰積水入空明  
簾影移花增媚嫵直疑聽雨六柱船只欠搖江數聲艣

舊遊我憶雲風堂看月東峯最高處翠微坐久露沾衣  
山館歸來雷破柱此間氣候豈深山無限風光收老圃  
陰晴難得兩不妨園圃況復當三五年年常願似今夕  
明月宜人雨銷暑

十六日雨霽夜出三轉橋踏月觀荷至十刹海浩  
歌達曉而歸

日坐樹根看月出涼陰一榻銷百憂今宵雨霽月可踏  
汗漫遂爲終夜遊十刹海邊幾僧寺三轉橋上多酒樓  
酒人已散寺門閉湖月漸升昏靄收水天一綠杳無岸  
荷芰四圍中有舟大葉翻蓋露頻瀉高花歛房烟更幽

悟來忽墮眾香國佳處自畫胸中秋風蓬不許縱孤櫂  
野步直欲窮滄洲北斗動搖樹深處西山滅沒雲盡頭  
此時天地極空闊曠曠觀人海眞浮渙荷花以外只明月  
閒身惟我偕白鷗逝者無窮駛於水達哉所願埋茲邱  
行聽街鼓漏將盡歸扣園扉吟未休詩成持寄石谿館  
此樂長安非易求

十七日梧門邀同陶季壽歐陽磵東出德勝門觀

三漢河荷花歸飲作歌

昨夜縱遊十刹海踏月三更歸五更看花更趁曉涼去  
故人入城同出城沿河楊柳好村舍但見紅雲無水聲

高枝出水葉覆水千花得意嬌新晴始知一雨善膏沐  
龍女絕代粧初成晨霞夕月肯相照霧鬢風鬟俱有情  
花開絕艷待真賞士抱孤芳遺世榮健馬高車去何驟  
葦離茅屋誰將迎同心妙得芷蘭氣野服來尋鷗鷺盟  
君家衡麓連瀟湘花時多於西洞庭吾鄉種藕亦常業  
溪民勤比山農耕歸田無計且飄泊對花未免思柴荆  
愛才今有賀四明金龜換酒能共傾迴船萬古謫仙淚  
不若痛飲歡平生

雨中獨遊三汊河觀荷歸呈梧門學士

君言看花雨後佳我獨能爲冒雨遊衝泥踏水十餘里

有驢可跨百不愁。濛濛衣袂任霑溼。酷愛新涼如早秋。  
茅屋無人雨中坐。喚酒頗勝湖上樓。一紅千頃碧萬頃。  
葉更參差花更稠。美人粧鏡拭初曉。徑來簾下看梳頭。  
溫泉一浴艷尤絕。風裳水佩俱修修。我爲看花雨不避。  
花因得雨香更幽。便思化作雙白鷺。花陰夢亦隨沙洲。  
紓路再尋十刹海。老漁拍手笑未休。前夜踏月今冒雨。  
客非狂疾何所求。入門飢腸已雷轉。但出新句誇朋儕。  
頑仙無賴天亦赦。縱使歸乘木乙舟。妙蓮花是前生骨。  
豈願人間萬戶侯。

書錢南園御史遺集後

我生不識錢御史一讀遺詩心骨酸如此人才竟渝喪  
豈獨吾道傷摧殘政府當時竊朝柄私門伏謁多顯官  
哀哉萬蟻腥穢集矯然一鴟霜天搏小臣何敢效汲魏  
聖人未幾誅共驩先陳讜議識獨早後褒直節

恩殊寬孤忠入地目雙瞑萬里經年歸一棺殘編賴有  
故人輯作序頗聞中夜歎謂梧門學士夢穀郎中兩君風義今少  
匹作者志行古所難生逢盛世廁清要恥效小技工  
雕刻甘墳溝壑頂至踵獨奉朝廷心與肝擠排不死  
天意厚貪墨先鋤民氣懼憂時熱血恣霑灑壓紙硬句  
多鬱蟠河聲秋挾雷雨壯獄色夜凌星斗寒吾儕自植

在忠孝其筆所縱皆波瀾依草附木必同腐倚天拔地  
終不刊卽如此集卷無幾苟非眞賞誰能看百篇豈借  
棗梨重萬劫乃共身名完嗟我憂患飽中歲徒避箏笛  
求孤彈學道不能愧何益琢句但知吟未安平生自好  
山鬼服昨夜夢君獬豸冠請棄一切鑄真我不願皮毛  
師杜韓

錢御史畫馬歌爲法梧門學士作

我讀公詩心骨寒我觀公畫毛髮動畫中天馬並殊特  
昨夜與公同入夢雙竹批耳風怒生五花滿身雲欲凍  
人間何處可橫行天上騎來不施鞍此畫懸處卽公榻

往日揮毫試奇縱遺墨搜求敗壁中知己九原堪一慟  
我知公畫不求似自寫平生託吟諷其氣萬里生不羈  
其骨干金死逾重駕駘愧我方伏櫪神駿如公信殊眾  
韓幹畫肉亦皮相伯樂賞音足心恫天閑今日方需  
材翦拂期爲當世用龍媒有種不易求名畫須充渥洼  
貢

次韻答梧門

論詩如論人所貴持定力才名畫作餅志士淚霑臆洗  
馬今達人御史古遺直綢繆千載交慘澹數行墨谿鶴  
秋夜聲嶺松歲寒色我作畫馬詩豈有凌雲筆輸困醉

膽龜芒角枯腸出感遇無歡悰贈言有深識廬岳高峩  
峩江水清湜湜特立憂未能疎狂氣先抑篇多元白酬  
句險孟韓逼學道求真詮斯言敢終食

和梧門雨中見柬

君詩如靈泉隨地爲屈曲深者澄作潭怒者乃飛瀑我  
性如閒雲不可受羈束偶然出翠微倦卽林下宿人畏  
狂生狂我避俗人俗愛我君獨真招我來不速詩龕近  
天涯舊址有懷麓湖上每縱遊鷗鷺往來熟看花上漁  
船踏月訪僧屋夜夜衝泥歸嘲罵到僮僕連日阻清興  
枯坐若幽谷雷雨入寸楮其聲雜歌哭中歲百念灰文

字好猶篤終嫌秋意多春氣苦不足不如誦君詩閉門  
看深綠但以雲水光貯此空洞腹

再答梧門兼示謝薌泉楊蓉裳張船山諸子

我詩不工君獨愛我性雖僻君不憎贈言游戲亦沉痛  
一笑翻遺淚溼膺十丈蓮花秋月色此語妙絕吾未能  
但以疎狂極詆斥哀哉下士聲蒼蠅吾儕樹立要千載  
紛紛毀譽安足憑韓蘇命坐磨蝎宮甚至蜚語來廬陵  
何況文章特小技主奴出入徒相凌眼前同調不數子  
謝公鶩若霜天鷹老船跌宕才叔雅謗書亦與名相乘  
君才所著定不朽卽論文獻尤可徵翰林五入進復黜

一官冷於退院僧我生四十百無就卽至蓋棺何足稱  
才華中歲并刊落憂患早年多創懲連日空齋坐雷雨  
西山隔牆喚不麌感君真氣發狂詠積憤一銷如解癥  
盤空硬語頗自喜崖松偃雪纏枯藤溫厚由來本詩教  
風骨豈在多氣矜願除肝肺槎枒盡只養襟懷空水澄  
匡廬佳處世稀有松翠作濤潭瀑水一庵暝坐萬事足  
浮生富貴風中燈

思元道人招同法梧門學士謝鄉泉楊蓉裳兩員  
外鮑覺生中允徐星伯庶常小集

道人爲我畫竹枝霜厓偃作蒼虬姿我詩有骨頗同瘦

粉落卻憶秋深時道人覶我釵頭茗一飲能教千夢醒  
我詩有味苦不濃綠雪甌深憐獨冷昨日爲君書劄蓀  
豈有健筆盤秋鴈風華頗悔少年作以君所愛姑強磨  
妙墨何當貽百朋讀之汗下方數升君抱玲瓏九仙骨  
況以慧香入禪悅一花一葉一如來千潭千水千明月  
月與君心同妙明花與詩思同怒發我來移榻臨西涯  
夜晴踏月雨看花疎狂自笑亦成癖寺牆村店皆塗鴉  
梧門詩老勇無匹獨恃精兵挑怒敵旌旗十萬陣雲高  
拔幟不容還趙壁雲中尺素忽見招雙鶴翩然翔九霄  
花前有月且同醉枯腸何必搜無聊酒闌啜茗坐深緣

更乞道人爲畫竹

妻香軒呈思元主人

冒雨看花有底急  
衣上湖雲曉猶溼  
主人招我開園屏  
一笑先穿籬竹入  
換卻青蓑仍戴笠

竹陰一雨生午涼  
新筍別來如我長  
芭蕉葉亦青出墻  
幽花浥咽吹異香  
尋花更繞丁字廊  
紅闌卧水谿夕陽  
夕陽忽下槐樹頂  
樹裏青帘漾風影  
喚酒逕思載孤艇  
溪邊蘆葦聲蕭蕭  
隔水野鶴不可招  
閑步卻隨人過橋  
船山爲王竹嶼通守  
畫江聲帆影之閣屬  
余作歌

鍾山五色雲秦淮  
六朝月誰放江天如此寬  
蘆花萬頃

吹成雪雪外空烟無限青嵐氣漠漠天冥冥千峯盡頭  
一帆去恐是故人別君處故人與君別十年舊遊飄若  
江上烟一閣依然俯江水不見當年供奉船君家才名  
擅昆仲紀羣交誼吾尤重梅花開時酒千甌醉墨瀲雲  
天欲凍謫仙一去騎長鯨君又孤飛作飢鳳葛帔相逢  
岐路間萬古青山醉一慟京師六月無怒雷車聲日夜  
揚風埃水亭一角已足詫名勝安得寒濤萬里滾滾從  
天來吾儕胸中百無有雲夢尙能吞八九風帆沙鳥忽  
飛迴一剪江光落君手船山之畫蘭雪詩動搖一筆千  
山移願君讀詩兼讀畫雲龍上下常相隨何必徑歸卧

江閣翻令故人感離索君不見山中宰相隨園翁聲華  
在日傾王公名山寂寞身後事何況富貴如飄蓬小倉  
山與君家近頗聞猿鶴哀秋風卜鄰有約未能踐千載  
相思圖畫中

題王子卿編修古香精舍看花懷人圖兼柬黃左

田宮贊

圓照寺中老梅樹故人同賞三十年一聲翠羽幽夢斷  
卻對冰雪思癯仙昏鐘才定月高出病蕊未花枝更妍  
孤鶴三更踏疎影哀蛩一徑吟寒烟直廬當日聽宮漏  
精舍可念依枯禪踪跡雲泥暫修阻心情膠漆終纏綿

風雨果踐對床約翰墨妙結多生緣仙才如此豈易得  
逸事無多宜並傳我愛兩君古風義何幸論交相後先  
竹林卻憶俊遊地笛聲欲斷斜陽天叢菊晚霜燕市酒  
桃花春水秦淮船歡場回首但陳跡舊交雖在如秋蟬  
浮生飄泊詎有涯江鄉大好歸無田且看秀句出寒餓  
莫將離緒繁山川石谿有樹況手栽花時作客殊惘然  
乞身偕隱計須早林間把臂呼梅顛

重九前一日宿秋隱山房次韻法梧門學士

佳節隔宵賞燒燈看叢菊一榻近西山先借花下宿看  
菊不嫌冷看山可醫俗況得兩佳士左右若修竹謂韓氏昆

仲胸中秋十分已餐水雲綠幽願吾始諧俊遊君更續

山寺聽說詩此味甘於肉

學士舊有山  
寺說詩圖

五更由太平莊至翠微山寺

開門星在樹就道霜滿衣籠燭十餘里村犬吠尙稀碌  
碌入山徑稍稍收林霏遙辨寺邊塔遂扣松下扉繞屋  
楓柏多其大皆十圍絳葉爛於錦遠近明朝曦庭蕉愛  
新長砌花亦相依託根避塵壘晚節猶芳菲吾生不百  
年苦爲身名鞭素心幸與偕佳賞焉能違緬懷杜樊川  
新詩吟翠微此遊踐夙諾風流庶可希縱目得遐覽冥  
心契元機何必效牛山俯仰增欷歔

三山庵次韵梧門學士兼寄陶琴垞明府

賞秋負前約名山勞寤寐積逋今一償吟策喜先墜腰  
腳幸未衰筇屐不求備選勝及蕭辰離塵得初地來經  
蘋果莊近較潭柘寺鐘磬無凡音竹石有幽意曉霜重  
於雨晴嵐溼逾翠惜哉東籬人不共西山醉五字君苦  
吟萬緣我甘棄尋花旣蕭散入山更深至寺僧驚早來  
花陰鶴猶睡

隱寂寺

背山尋寺路轉僻一院青苔少人跡銀杏兩株古誰植  
蔽日吟風太蕭瑟其根落葉深徑尺鬼斧千尋削丹壁

雲縫坼開天一隙澗花枯死但荒石我行礮底穿樹出  
大笑卻踏蒼龍脊下有古井湛寒碧洞中之天真隱寂

龍泉庵聽泉

寺門亭午殊蕭森龍氣所結雲爲陰不知泉脉出何處  
潭水一碧無古今人間苦旱仰神惠山根滴雪成甘霖  
文魚五色豈靈種我來拊檻觀浮沉竹鞭穿地松插天  
鱗甲隱現疑可尋谿風響答萬籟合不雨亦作蒼龍吟  
此山石奇樹尤古惜少瀑布飛遙岑寺樓倚山山卧水  
遂以眾影爲幽深箏琶平日厭繁會風泉一聽生道心  
諸天原是空明相下界誰聞微妙音

香界寺次韵梧門學士

靈鷲傳飛來蓬萊割左股天人講經地羣龍首皆俯中  
峯勢特尊名賢跡堪數曠奧妙能兼淺深隨所取高嶺  
疑石帆平湖想烟艤遙看征鳥還近可孤松撫餘采或  
成虹空翠亦爲雨滄苔得佳泉尋菊入荒圃回望寺後  
山微雲自吞吐坐久齋鐘聞斜陽下西廡

寺前望海淀諸山及蘆溝橋

界在香山南迤邐若平坡其地乃峻絕樓觀俱峩峩  
闌眺九州積氣連山河昆明水一盂玉泉小於螺隱隱  
蘆溝橋日夕車塵多貴賤各有營嗣若燈上蛾大悲生

悟中觀世涕滂沱不知兜率天視我當如何

寶珠洞爲翠微最高處山徑險絕循崖而上獨至其巔

寺前天沃寥寺後山龍捉幽尋未厭深曠觀尙嫌壅懸厓削鐵仄徑敢移踵藤蔓攀苦高石根危欲動得樹猿臂伸望雲鶴身聳遂極千仞遊下見萬山拱疊翠爲奔濤其氣與雲湧渾河天外流夕照如潑汞同遊到或稀異境佛所寵筋力豈不勞孤造恃神勇

上山如梯空下山如繩城投身黃葉堆墜若浮雲輕撥雲尋古洞窅默惟松聲中有金粟相枯坐萬劫平洞天

無日暮洞卉無枯榮不聞不見中乃現大光明入洞復出洞我意但孤行學道持定力息機觀眾生無心險亦夷有志堅乃成閉關願投老先與茲山盟

半幅精舍看月聞笛聲甚美

樵歌直下翠微頂清磬隔林山寺暝一逕夕陽踏人影歸雲下山如晚潮拄杖我同雲過橋紅葉滿樹風蕭蕭洞雲未歸月先起夜色空明已如洗月華有露兼有霜月氣非煙亦非水千峯萬壑不見底我但聽泉坐山觜謾謾松風吹醉耳

三更月落山暗碧繁星隱樹雲潑墨中峯有客倚橫笛

吹入霜天裂崖石一聲鶴唳秋山空紫裘進士豈再逢  
乞詩來就東坡翁

是夜四更驟雨坐待曉晴而歸次梧門韵留別寺  
僧

尋秋夢已深徘徊入谿樹水聲瀉虛檐眼花拭昏霧一  
夕陰晴兼新遊亦奇遇踏月或孤往聽雨卻同趣榻擬  
詩龕移寺借寒山住曉鐘催客還天青白雲互小別殊  
仙座浮生足憂怖題名崖竹枝願乞天龍護

讀梧門學士寶珠洞詩次韵書後

老樹如龍怒穿壁下有蒼藤絡奇石騰身直上第一峯

萬里秋霄掃寒碧半空誰擲蓮花來山勢欲捲河聲回  
生天有願必到此自崖而返徒低徊先生詩若洞天邀  
邀我入林容把臂硬語公然壓孟韓大海蒼茫擎金翅  
筆墨所化爲煙雲眞宰上訴諸天聞優曇一現世希有  
狂花敗葉徒紛紛探奇我欲徧岩洞明月催人白雲送  
只將瘦句寫幽深豈有雄篇懶飛動瓣香且喜佛同金  
苦筍回甘味漸諳請以詩禪偕菊隱何如雪北與香南

初十日同梧門先生自西山歸邀集李北溟學士  
恰受航看菊次梧門看月韵奉答兼示周希甫  
太守楊蓉裳員外陶琴垞明府陳石士編修

明月未圓花正好萬事不如達觀早愛月同倚西山樓  
愛花同賞東籬秋放眼人天須絕頂痛飲花前不求醒  
昨日天上今人間惜有花月無谿山衣上白雲溼於雨  
醉中描筆花能舞笛聲豈待山陽吹身世蒼茫生酒悲  
蓬萊失腳墮塵海憂患十年此身在故人萬里風吹來  
謂希甫且對菊花懷抱開霜月可憐好顏色照我看花相  
檐側金門宦隱皆浮家西山何必非西涯吾生不願死  
章句月地花天醉千度

喜晤周希甫太守

薊門望黔中征鴻太迢遞安得萬里風吹君天外至臺

極握君手一笑乃成涕離別豈足哀萬感迫中歲君早

收盛名我亦負奇氣瓣香因藏園車笠執高義餽居況

比鄰稍暇輒相詣贈詩寫纏綿老蒼出新麗同時王給

諫翁性情交最摯

李介夫

詩特精悍羅兩畫頗風致自

峯

二十年後遊如隔世三君皆九原存者復憔悴花開積

水潭踏雨入秋寺追念平昔歡安得不沈醉聞君辭中

書出爲大州吏崎嶇戎馬間歌聲雜鐃吹積勞遷一官

領郡百蠻地其水多苦鹹其山多瘴癘土風化淳朴民

力拯凋敝清貧固所甘身心亦云瘁自言官事冗人矣

唱酬廢幸有賢公子剩稿出行笥攬勝多名篇懷古寓

深喟始知簡要人蓄深發逾銳我嗟嚮道晚苦吟亦偏  
嗜浮沉憂患中其語皆夢囈前年客揚州二豎苦爲累  
自定平生文已託身後事枕上秋懷詩一淚成一字感  
激多天眞狂愚觸時忌中聲知未諧痛定欲焚棄持示  
王鐵夫謂得冰霜味危言多自懲聞者亦無懲遂以過  
而存並用誌吾悔今年罷春官閉門耽熟睡小蹠無成  
心奇災幾滅鼻四月廿一日事生死益達觀湖山恣游戲博士  
署新銜蓮花有仙意余用陸放翁詩自稱蓮花博士昨聞西山招赴若  
秋鴈驚攀藤陟千仞洞天極幽邃歸來展重陽邀君把  
吟袂嶺雲尚隨身濛濛落空翠百年塵海深浮名適爲

累好山與故人何可失交臂願君理吟鞭前悰歡未墜  
燒燈對籬花同君續遊記

題陶季壽野服小像

松聲吹作雨天風與泠泠石氣結爲雲崖壑同一青瀑  
布雲際來觸石爲雷霆奔流下人間爲瀟湘洞庭中有  
騷客魂萬古秋常醒君實生其鄉束髮誦遺經餐菊衣  
薜荔骨味皆芳馨何年墮塵海一官如梗萍坐令屈宋  
流手版趨頭廳我才不及君山澤甘沉冥天寒吟瘦詩  
只許孤鶴聽與君爲兄弟相依如影形唱酬日以密風  
義心所銘感君彈古瑟哀怨來湘靈持此畫一卷讀之

淚雙零君壯及世用我衰鬢先星寶此一日養豈願帶  
萬釘飢寒迫我出負米同伶仃冷官幸無事讀書拾秋  
蠻且尋文字飲謝彼梁肉腥故山松石多其下有茯苓  
會當荷鋤歸求以制頽齧衡岳與匡廬誅茅結兩亭扁  
舟待君來花時門未局

奚鐵生山水橫卷爲蘇璞園御史題

鐵生不見已十載一杖徑爲泉下游好山幾筆青入畫  
故人淚落西湖秋君與鐵生未相識愛生風格能見求  
身前傲骨挂喬岳死後逸氣凌滄洲自言此卷妙無匹  
藝一價合千金酬君詩與畫信雙絕願以佳境供冥搜

霜天攜酒菊園寺谿聲到枕山人樓歸磨凍墨題卷尾  
細看畫理銷羈愁白雲缺處有茅屋黃葉村前誰釣舟  
一官雞肋太無味二頃鶴田難預謀閉門連日雨中卧  
有夢只隨沙上鷗冬花舊宅念猶在買山安得居杭州

香蘇山館古體詩鈔卷六終

香蘇山館古體詩鈔卷七

東鄉 吳嵩梁 蘭雪

蓮花博士歌

蓮花博士官散仙千壺美酒當俸錢  
看花痛飲仰天卧醉腳一踏紅雲穿都城  
亦有萬花海罡風吹墮幾洞天  
遶花十里出山寺弄水三更移釣船  
夢騎赤鯉擲波去新粧導擁千嬪娟  
放翁曹別五百年手折花枝招我前  
鑑湖爲我指歸路湖水釀綠花成烟  
冰銜有分注丹籍火宅何日開青蓮  
綺語銷盡雪霜味仙心肯負湖山緣  
人間冷官但飲水天上故人能薦賢

附錄

翁方綱  
覃溪

世間有此仙曹否俸餘月給千壺酒五百年前陸放翁居其前者放翁友放翁去後五百年不得其人歟人懸東鄉吳生詩健者姓名早注雲笈邊再上春明蹙息翼爲此遲作瀛洲仙飛觴日日澆塊磣渴思倒瀉銀河水盈締蘇齋蓮作裳謂臨川樂生不知誰得蓮洋洋忽拈詩境喜欲狂放翁衣鉢從今始放翁手揮詩境字鑑湖多少詩家事千載相關詩性情覓君來補仙曹吏此官此酒不易償陸耶吳耶爲誰置吳生官舍璧沼前披簪甲乙磨丹鉛正從杜老聽簷雨肯許

蘇家乞酒錢緣槐陰下蓮漏添踏藕且莫思蒲帆卽  
教微首簪毫去仍帶蓮花博士銜生卽遷中書舍人也

蕉山園賞菊贈趙象庵中翰兼呈謝薌泉禮部

養花須識花性情愛花更取花標格菊花艷冷不宜春  
開向寒天能五色趙公養花如養賢根培沃土澆清泉  
吳生愛花愛成癖頗恨花時無酒錢花前一見各傾倒  
便約移樽事幽討東鄰謝公興尤逸扶病看花來獨早  
菊意亦愛詩人狂萬花含笑迎曉霜主客如此不一醉  
賞秋誰展花重陽

英煦齋先生出示喜雪詩用東坡聚星堂韻同作

五更打門疑敗葉寒響蕭蕭變成雪小院回風聚漸多  
縛帚無人屐痕絕菊叢入窖孤花開竹筍出籬凍枝折  
晨光干樹遠逾淨夜色數峯高未滅公持健筆追東坡  
碧海長鯨手能掣心香妙已爇旃檀齒慧何妨交綺纈  
我生瘦骨太嶮嶒許以微吟共騷屑乾坤萬事入雙矯  
富貴六花同一瞥頭低肯爲孟郊下願解願參匡鼎說  
古來秀句出飢寒僵卧未妨身似鐵

明天啟小斧歌呈煦齋先生

九重宴坐木爲偶倒戈親授寺人手奇技淫巧傷心多  
天子雕蟲古無有天啟紀年字鏤金一物雖小關荒淫

運斤當日擅天巧不傷君手傷臣心三殿功成萬靈哭  
厥臣建坊拆民屋鏤鳳盤龍猶不足生祠篆刻沉香木  
巴蜀戰血流成川內廷鉦鼓聲震天東林正士盡湯鑊  
陛下絕藝窮雕鐫汪直將兵持兩鉞前振後瑾同一轍  
此斧區區太不祥鑄錯眞成六州鐵君不見太祖開基  
明訓在宦官典兵首須戒但使畏法忌有功何況操刀  
來禁中又不見司天監進水晶漏碎之殿前如瓦缶不  
作無益害有益何況木工手親刻茄花委鬼何代無格  
心第一謀非迂聖朝自賞金鑑錄大臣只進豳風圖

送王竹嶼通守之官浙江

燕山雪花大於掌馬蹄踏冰石橋響別駕風流自昔聞  
使君去作西湖長湖上十年懷俊游卜居愛近桃花港  
持節由來多大賢題襟有約皆吾黨烏衣門巷繼清聲  
竹馬先春迓入城看花都人畫標格飲水須畱詩性情  
病崔仰天發孤嘆閒鷗與人尋舊盟憑君一問斬王宅  
手種梅花幾樹成

煦齋先生屬題秋燈佐讀圖

一年最愛秋夜長百讀始知書有味雙影圓圓共一燈  
況是金闈賢伉儷架上萬卷書卷卷翁所貽郎君不讀  
翁不樂苦心只有寒燈知篋中五色絲絲姑所理持

絲作繡君所憐佐君讀書姑亦喜一絲才挑一卷續妾  
繡未成書已熟裁衣不用金錯刀恐放刀聲亂君讀讀  
聲愈高繡愈密不管窺簾霜月入花樣新鮮頭緒多半  
猢猻飛唾絨溼讀書刺繡同一心妾心更比君心深願  
君自愛生花筆願妾長縫連理針妾手漸酸君亦倦自  
淪茗齋滌詩硯床頭侍女喚不醒一翦燈花落成霰芙蓉  
並蒂繡初成吉識先占及第名從此綸扉襄補衰依然  
戒旦賦雞鳴金針傳遍鴛鴦譜畫裏青春認眉嫵家  
法教傳兩鳳雛莫倚聰明廢勤苦吾家孱婦亦云賢績  
火芸窗話惘然清時佩黻輸君早秋夢酸辛二十年

觀生閣畫蝶歌

畫花兼畫香畫蝶兼畫影春風五色忽吹來栩栩春魂  
飄欲醒其心細於髮其腕疑有仙一藝亦求精且妍讀  
畫皆誦夫人賢聞說拈毫如刺繡丹碧經年涴衫袖君  
家伉儷皆天人趙管風流肯居後鷗波真蹟今猶藏閉  
卷惟聞冰雪香後五百年論書畫造園便是蓮花莊才  
名笑我輸邢愿文弟丹青頗稱善落花芳草畫江南蘭  
兄蕙嫂題都遍故園花事一年秋歸夢迢遙雁亦愁願  
向金闈求粉本瓣香供養繡詩樓

寄石谿館用東坡江西韻

新詩一讀思故邦  
北風三日冰寒江  
山翠寒於七里瀧  
雪天野寺疏鐘撞  
樹根孤艇聞流淙  
老漁八十鬚眉龐  
夜燒松火尋釣石  
驚起鷗鷺飛一雙

樹琴先生以雪水煎茶見貽用東坡和柳子玉喜

雪韵奉謝

露盤不救相如渴  
欲賦凌雲愧才竭  
一甌持送意良厚  
龍井新芽煎綠雪  
廬山惠山皆不如  
上冷中冷應鬢鬚  
氣以微妙參梅花味  
以清醕比琴德寒流  
漱齒思故谿  
仙夢探懷得明月  
東坡綺語懾迴文  
誰淪龍團矜艷絕  
平生詩骨冷于冰  
正苦春風吹未熱

十一月廿七日復雪樹琴先生邀集藏松精舍用

東坡江上值雪效歐公禁體詩韵

江鄉頗念田坼龜明年二麥青可知雪深一尺蝗一丈  
候琯早驗葭灰吹適園亭館在圖畫侍郎覓句方撚髭  
方塘半畝水雲合一凍那得流晨澌籬葉深埋曲徑曲  
石笋峭立危峯危爐烟細可煎綠茗硯水暖與研紅絲  
眼前但取真樂在身外焉用浮名爲有花最愛雪天賞  
有手只願霜螯持故點紅燈索笑巡檐不畏寒侵肌  
鷗波妙墨故相匹時出介文夫  
人畫卷同觀況有驥子兼熊兒神仙  
富貴自風韻肯負酒熟花開時門生排日送佳釀謂蓮  
龕伯

昂諸君承歡儼若趨庭幃黃梅格高艷逾冷鉛粉敢涴天

人姿花氣酒邊正芳烈酒痕花下何淋漓異軍後來能  
白戰同官前去趨形墀聚奎堂前昨高試是日余自貢院晚歸

文字堆案金沙披苦樂相償亦妙理馬銜驛脫天馬馳學  
道要作有源水立言豈爲無當卮萬事人間鴻爪印百  
年我輩雲龍隨雪車冰柱句誰健心折只應韓退之

蠟梅用東坡答趙景貺韻和樹琴先生

扁舟歸載江南花觀生閣裏花爲家檀心磬口蒂融蠟  
風味宜人真俊物竹鱸煎茗燒黃葉移對此花兩清絕  
花開忽憶香蘇山翠羽一聲人未還尋香便踏溪橋去

烟水黃昏先得句看花難覓同心人影到窗前疑是君  
昨夜南枝夢飛越落月亭亭大於鉢

觀生閣紀夢詩爲煦齋先生作

北斗在天司帝樞七星隱隱扶斗車神有雌雄行左右  
法相示現人天殊玉宇高寒萬靈護珮聲誰躡飛瓊步  
仙人昨夜踏空行親到洞天最深處洞天未入路紆迴  
別館玲瓏映竹開窗外碧桃三百樹未花時記手親栽  
小立移時香入袂花雨濛濛綺疏閉爲說華胥夢正酣  
小語莫驚仙雀喫須臾侍女啟瑤扉天姥嚴粧御墨衣  
廣榻殷勤邀並坐前游約略話初歸鈞天樂奏層霄裏

淨洗下方箏笛耳霓裳一曲聽未闌萬頃仙雲化爲水  
水雲縹渺接空青神怪出沒波濤腥微笑書空成梵字  
靈光一墮天冥冥罡風吹夢曉無迹去來因中誰省識  
神仙眷屬古曾聞緣重雙修豈雙謫慧業多生種福同  
烟霞上界結千重驂鸞若記來時路只在仙山積翠中  
崇之上公以蠟梅見寄丁巳年

雪霽一徑披銀沙老樹倔強可擎暗香昨夜入詩夢  
檀心先吐南枝花苦寒醞釀出正色紅白不許相凌誇  
丸書火急洩春事況從朱邸來貧家催詩未用打鞞鼓  
意思萌坼如含葩屐痕卻憶石谿路黃昏月映紅山茶

趙象庵舍人邀賞蠟梅

白梅不宜燕市種此花大益亦清供遙園昨和東坡詩  
故事君家足吟諷花蕊一凍開愈繁暗香浥浥浮黃昏  
騎驢更入城南路新月與人同到門故人病起髮新白  
泉  
背花去作尋山客老梅苦憶上方寺踏雪有誰重  
蠟屐金卮滿酌須盡歡芳信十分催歲闌百年世味嚼  
成蠟只有寒花禁久看

孟春六日大雪用東坡微雪與子由同訪王定國  
小飲清虛堂韻

凍雲壓屋冰溪沙朝衫昨未趨南衙殘臘風光送燕雪

紅燭三更花不謝家樂請奏菊部頭新聲妙伎前無儔  
舞衣迴月艷當席歌舞管過雲低入樓座中姚生藝尤妙  
金屑琵琶鳳凰叫天寶供奉骨已霜此曲人間成絕調  
一聲掩抑一聲催大絃么絃往復迴曲江風暖黃鸝嫩  
湘水天寒白雁哀雷火燒天山怒裂萬馬踏人刀飲血  
將軍夜奪崑崙關帳下金樽酒猶熱十指風快心雲閒  
欲收未收聲漸闌畫撥當胸一聲斷四座沉默如空山  
吳生舊作康山客悔與姚生未相識花落江南又十年  
岐王座上今頭白對山往迹已成塵朱邸笙歌又一新  
詩成願付雙鬟唱誰是簪花傅粉人

書臧孝節先生傳後

母在不敢死兄在不當死原鵠急難呼不聞孝友如君竟先死行狀萬言書萬紙有兄傳君君不死

兒生有母疾病纏兒能割股母病痊以身殉心心格天減算益壽天有權兒壽三十母百年天乎何厚三元錢

謂湘  
船  
侍郎

兄游南海弟不悅弟游浙西母念切暫游卽歸心尙折門外虛迴長者輒經舍校書夜風雪先考遺事書瑣屑孝傳百卷精力竭字字孤兒心上血

奉母愛日居讀書拜經堂兒命一何短兒心一何長母

哭兄哭兒不知卜兆乃在先塋旁墓前種樹必連理上  
有慈烏啼曉霜

感臧氏兄弟事追悼伯子懷亮再書傳後

君無繼子兄代立君有遺文兄補緝我亦有兄嗟早卒  
生事未遑死何述堂上有母衰且疾中有孀嫂下孤姪  
婚嫁頻年力交紬隻身千里百憂集一官偃蹇年四十  
讀君此傳悔何及

寒窗孤掩青一燈桐屋入夢山峻嶒昨夜爲兄書墓銘  
淚痕入墨墨亦水平生積咎逾邱陵空文何取師歐曾  
以詩頌君先自懲補過無術但撫膺黃河凍解歸棹乘

乘官奉母吾猶能

余秋室侍講二喬觀兵書圖爲莫韻亭少司空作  
魚水君臣花姊妹快意江東得雙婿鴛鴦社裏讀龍韜  
月偃眉梢得秋氣啼粧連騎皖城來當日流離事可哀  
英雄偏極東床選帷幄先資內助才金闈紺帙繙清晝  
葉葉芸香吹欲透玉郎妙解八陣圖元女疑聞九天授  
神亭畫戟定三分一炬東風百萬軍紅袖若麾名士扇  
白虹應化美人雲絕世聰明傾國艷佳偶千秋況同傳  
吳宮鏡影暫團圓赤壁簫聲易哀怨銀刀一隊燭千條  
阿妹風神匹二喬洞房莫洩陰符秘靈澤祠荒又晚潮

題戴簣圃先生進履圖遺照呈蓮士師

子房王者師初亦俠少年椎誤博浪中書乞黃石傳銳氣一以挫進履圯橋邊豪傑能自屈遂執經世權公昔作都講文采朝日鮮才高氣逾下積蘊久始宣出爲名公卿宦成早歸田畫圖念疇曩自視殊歎然乃知卓識人不居萬物先致身已風雲跬步猶冰淵所遭異今肯用心皆大賢學道有眞獲何必求神仙

吾師秉庭訓虛己追前修下懷結鞭謙上竭補袞謀齋名震无咎朝夕省魯尤豈以一日安暫釋終身憂此圖遺像存授簡涕先流自言

君父恩平生百未酬嗟我鴛鈍資從公兩世遊嚮道悔  
不早罪責逾山邱轔輶二十年失足如墜溝始信客氣  
多自戕勝戈矛詩成創痛深法戒願終求孺子幸可教  
所志非封侯

桃花書屋圖用東坡寄吳德仁韻爲子野郎中作

一春賞花無酒錢閉門終日磨丹鉛花前得酒飲須痛  
奇字誰能誇太元今春花事尤可憐夜聞雨聲愁未眠  
新晴難得好風日桃花一笑殊嫣然吾家季子豪且賢  
座有畫史偕詩仙拈花妙解得三昧綰衣紅粉俱參禪  
豐臺芍藥種作田溪堂萬柳青粘天俊遊寂寞待君繼

醉舞肯爲桃花顛諸君搖筆詩湧泉游絲飛絮安能纏  
胸中自有武陵在洞雲多事遞漁船石溪水遶南塘原  
燕支雪落埋春山誅茅合踐故人約花裏讀書三十年

題金瑤岡侍讀一百二十本梅花書屋圖

雪晴亂坼千花蕊香透松陵灣下水鄉山臨別畫梅花  
此味清酸比梅子來往銅坑二十年故人如水水如烟  
看花一過猶悵觸何況親栽樹插天香蘇亦種梅千樹  
夢踏寒山覓歸路落花滿地白於雲翻恐月明無着處  
水霜闋盡苦吟身狂煞紅衣下拜人余有拜梅圖我詩只有  
梅花氣老屋東西待結鄰

六月廿一日集陳石士編修太乙舟爲歐陽文忠

公壽分韻得然字

公繼韓愈出相望三百年門下士蘇軾序公集以傳公  
事具宋史公文家一編祀典在國學私淑寧鄉賢公生  
甫四歲孤露吁可憐詎知畫荻字能表瀧岡阡平生忠  
孝骨挫折久益堅憂時髮早白仁廟爲惻然眾號啄孤  
鳳一雲障青天排擠幸不死酬恩無萬全四十稱醉翁  
山水弄清鮮六十解機務未病求歸田碌碌富且壽公  
視若浮烟進汲天下士退執名山權嗟我亦少孤僅免  
溝壑填覲顏負母教有生皆苟延望道乏涯涘論文愧

雕鏤窮達節豈殊所懼辱其先願公鑒積誠結此千秋  
緣座客誰沈遵侑以朱絲絃

津門拯溺圖爲沈小如觀察作

津門地當河海交平時百貨連千艘六年大水鬼夜哭  
田廬蕩析爲波濤使君禦水如禦敵三版危城捍堅壁  
使君救民如救蟻萬命手援溝壑裏城頭席舍蜂房多  
城下往來舟擲梭蛟龍擾人怒不得鴻雁求食哀如何  
小麥煎餅大麥粥飢民暫飽甘於肉

天家後放水衡錢使君先借官倉粟官力易竭心難舒  
中夕撫膺聞嘆吁痛定回思淚如水當局憂勞可知矣

使君今擢賢監司民力善養需天時大臣憂國本根重  
請誦幽風未雨詩

王文簡公生日石谿詩舫小集覃谿師取公謂蓮  
洋語書詩髓二字見貽感賦長句卽題秋林讀  
書圖後兼呈小峴先生

公論詩法主神悟獨以得髓稱蓮洋蓮洋所得定何似  
桃花流水春茫茫河流盡繞王官谷中條積翠連空蒼  
前有遺山一詩老吐納元氣調官商風流盡得鵲山句  
低首平生吟諷長仙才萬古有真契法乳一滴誰先嘗  
吾宗落筆自超越親炙亦幸升公堂嶽氣河聲儻蟠鬱

雲龍天驥尤騰驤蘇齋源出崑崙黃琳樸學冠世詞益  
昌睿音精奪趙秋谷

師有古詩平仄舉隅駁正聲調譜甚詳

尋味妙過嚴

滄浪詩鈔手定搜著錄寤寐依公書庫旁從知孽海有

金翅才容掛角追羚羊嗟我從游二十載豈有秀句誇

天章八分辱贈詩韻字真諦似許參毫芒是日祀公薦

清醴敬懸公像庭中央文生

與也

畫許倣林屋盛子

升局又隨門墻頭青山夜來雨屋背紅樹天新霜讀

書昔記兄若弟

西樵題孰和葉與汪

訥庵鉢翁

石帆亭小得

詩意石谿秋影俱斜陽願求三昧不傳秘同葵一家無

礙香

禮烈親王箭頭歌

烈王腰間大羽箭射馬射人經百戰耳後風聲啼餓鷗  
箭力所到無重圍皂鵠翻雲虎人立一發洞胸鬼神泣  
陣前攫胄摧賊鋒雪夜斫蠻收奇功邊牆踏破中原定  
帝錫彤弓拜家慶箭傳三尺六寸長雄姿想見龍騰驤  
白翎金幹不可得此物摩挲關手澤王有名馬能報恩  
作歌我昔貽王孫千金駿骨世難買三脊狼牙幸猶在  
願王寶此功載銘肅慎貢已來 周廷

醉時歌用杜工部韻

世事如雲都不省獨抱秋心耐奇冷瘦羊暫飽丁祭肉

閉門誦經貧亦足治術遭逢企三代性命高談卑兩宋  
奇才應運定何人畫餅虛名愧無用文章傳世尤可嗤  
平生蠹稿纏蛛絲眼前不值一杯水身後妄作千秋期  
乘官不自惜投筆復自疑養親且賴乞升斗殺賊安得  
提偏師百感蒼茫付一杯酌拔劒高歌淚橫落醉卧青天  
明月高夢裏松風吹萬壑一聲白雁江南來石谿花雪  
封青苔十洲三島安在哉坐令仙骨污黃埃故人花下  
肯同醉北邙何待澆千杯

趙子固畫蘭爲李芝齡編修作

冬青樹老啼鵙苦玉葉金枝葬風雨幽蘭甘作背時花

難得趙家乾淨土吳興夫婦亦神仙塵海飄零更可憐  
墨花一卷遺民淚香透西陵舊酒船

題蓮舫孝廉品石圖

君從武夷來手持綠玉筠袖中千疊雲化作飛來峯  
峯飛入畫圖裏山氣蒼然潤成水龍跳虎卧太奇偉細  
摩芙蓉有肌理洞天三品安在哉壺中九華定如此君  
愛此石晝逼真襄陽顚米疑前身平生自負撐天骨我  
亦歎寄磊落人

六月十四日同梧門學士訪悅性上人因得縱觀  
荷花次韻有作

一歲花開無幾日避熱誰能戴星出花時不約故人看  
何異故人交臂失我頭漸白花更紅水邊舊識多鳧翁  
萬花海裏兩閒客浮雲一掃天爲空唱和新篇滿人口  
未願高名匹韓柳看花同我二十年氣味醕於眞一酒  
昨宵一雨花放齊橋東爛熳通橋西紅雲斷處卧山影  
半龕空水開玻璃藕船搖搖蕩花入漁弟漁兄衣盡溼  
一花持歸供佛前出水亭亭猶玉立蓮花風裏坐禪時  
解脫從今得導師綺語早除年少業妙香先入老夫詩

題錢梅溪護碑圖

表忠觀已還蘇碑此石南原加護持百年金券襲封地

五夜粉盤書事時國人墮淚有遺澤宰相撰文無愧詞  
不比臣佗南粵老妾竊帝號誇蠻夷

衣錦兩都守先墓剖玉三世襄真王木龍江干識奇中  
銀鹿帳下兒非常甘露泣然尋古寺綠雲已矣嗟虛堂  
願告史館亟收采綠辭細揩文字香

題保九真吏部小照

西漢循卓吏執政皆名卿治術非素求樹績安由宏君  
本牧民官入司課吏程惠政久翔洽選法歸澄清下直  
一卷書林坐兼溪行高才有餘暇素心無外營池荷脫  
晚艷庭梧起秋聲江鄉豈不佳歸夢難爲成我之救時

畧委竊文字名會當投紋去奉母謀躬耕望君展所學  
積困蘇疲氓出處各有願幸弗孤平生

題滄浪亭圖爲汪艾塘編修作

一亭豈足說小住疑神仙子美昔買山只費四萬錢  
輸林此下榻與余相後先至今魂夢間得句皆蒼妍京師  
苦賃屋百金才數椽伏雨漏溼多一日坐屢遷君來會  
乘幾念之心惘然況余久羈宦何忍拋林泉行當奉母  
去全家上歸船石溪有舊館手栽樹參天滄浪路所經  
移篷泊秋烟懷人發孤詠或繼歐蘇傳

題綠姬畫蘭奉酬黎湛溪太守

九年不宴秋屏閣薦北吳西感蕭索車騎前朝過草堂  
檐前細雨花初落一雨十日泥塞途咫尺不見心煩糴  
仙句化雲飛入袖侍兒刻畫成名姝廣文先生飯不足  
豈有紅粧貯金屋一笑微參詩畫禪下筆居然掃塵俗  
畫蘭婀娜勝塗鴉露葉風枝整復斜冷官靜女同心性  
開作秋山澹絕花花態低昂葉深淺昨日揮毫簾半捲  
持換新詩讓合多只有香風隨近遠故人久別念清貧  
迢遞鄉山人畫新因君一訊蘭因閣小築鷗波待結鄰

謂萬  
岡夫婦

坡公生日覃谿師招同法梧門宋芷灣劉芙初顧

南雅洪鑑亭集蘇齋觀風水洞題名四字拓本

去年畫公赤壁磯笛中孤鶴聞南飛今年憶公風水洞  
漫行破曉春禽喫洞中題字七百年姓名踪跡疑神仙  
誰知臘尾一杯酒重結蘇齋文字緣公判杭州凡五歲  
日夕籃輿湖上醉烏紗白葛道衣涼題遍南山北山寺  
此地公後香山來

長慶二年白樂天來游有詩

石門窈窕泉聲哀歸

瓶滿意貯冰雪翻羨同游李節推異日幽尋更石屋亦

有斷碣埋蒼苔

是日又觀石屋洞題名拓本

湖山萬古足清賞世事

如雲何有哉蘇齋年年拜公像妙墨天教侑佳釀仙風

乳水故依然紅日烏雲漫惆悵

齋中舊藏天際烏雲真蹟

先生小謫

公後身玉堂嶺海同一塵惜哉洞天未親到獨以長句

追清新我詩苦作寒蛩叫裂石穿雲豈同調舊遊回首定山村騎馬尋春愧年少項生紳畫手今擅場補圖合

繼錢

楷與汪梅鼎

落梅如雪覆溪水花裏東坡笠屐香

舊歲錢汪二君作李委吹笛圖今欲屬項君取漢橋晚溜浮梅夢句爲圖

自題扁舟歸養圖

無錫華冠作

大椿失榮庇慈竹延春陰涸魚待微沫羈鳥投故林嗟我有兩母撫孤實同心連枝復中折謂先兄獨絃多苦茗香音廿年困場屋一官憲朝簪微祿徇升斗非慕紫與金嫡母年八旬道遠憂難任吾婦奉吾母舟車瘁登臨就

養來京師五載何駸駸宦味日以苦家累日以深母年  
今七十鬚雪殊蕭森贈言謝羣公壽酒爲強斟謂兒有  
嫡母衰病近愈侵諸孫雖繞膝念汝常呻吟兒跪奉母  
教暗淚先溼襟行買潞河櫂歸指蘇山岑

藏園吾所師

蔣心餘先生奉母鍾太夫人乞假出都有歸舟安穩圖亦華吉厓筆

至性立

人紀四十老翰林

公有私印曰四  
十歸田老翰林

奉母歸田矣公名滿

天下一官如敝屣公歸并無田束脩代甘旨吾年今過

之母健差可喜博士冗且卑何爲久畱此扁舟繫柳陰  
圖書半行李白髮居中央其傍妻妾侍誰與爲此圖錫  
山華居士昔寫老宗匠今傳詩弟子骨肉幸團欒林泉

慕清美出處敢云同風景頗相似世法如空花榮悴一  
彈指惟茲翰墨緣不朽在根柢冉冉還山雲迢迢渡江  
水但祝母期願承歡卽詩髓

香蘇山館古體詩鈔卷七終